

## N O S   H U B E N T U D

Hopi biaha ta ser bisá cu e hubentud di awe ta e lidernan di nos comunidad di mañan. Esaki riba su mes ta nificá cu e hobennan di awendia mester ser prepará i guiá ariba un bon caminda.

No solamente nan mester ser prepará na skol o na cas, pa asina nan por sirbi i defendé nan pais; pero mas bien pa nan síña carga e responsabilidad i disciplina cu esaki ta trese cu ne.

E pregunta cu ta bin padilanti e ora ei ta:

Si ta e maestronan na skol i e mayornan na cas so tin e tarea pedagógico aki pa educá i guia e hobennan, pa asina cu despues nan por ta ciudadanonan responsabel i útil pa pa nan comunidad??

Of ta asina cu henter e comunidad arubano no tin un responsabilidad colectivo pa nos hobennan??

Cu otro palabra nos politiconan - nos partidonan politico - nos corantnan - tele-aruba - nos emisoranan radial - nos comerciantenan; no tin e responsabilidad pa traha na un desaroyo sano i un conciencia critico di nos muchanan???

Es deoir un desaroyo sano caminda cada mucha/hoben por tin locual e ta merece i locual e tin derecho ariba dje.

Un conciencia critico cu por juda nos muchanan pa distingui kiko ta bon i kiko ta malo. No ta manera nos ta pensa i ta kere cu locual ta bon pa nos mester ta bon pa un otro. Ta mescos cu mayornan ta pensa hopi biaha cu e locual ta bon pa nan como adulto mester ta bon i aceptabel pa nan juinan(hubentud).

Mayoria di biaha ta net lo contrario.

Locual cu e hobennan/hubentud ta hanja bon, mayoria di biahnan ta intolerable pa mayornan i locual cu e mayornan ta hanja ta bon pa nan juinan - e hobennan ta rechasá.

Ademas di esei no ta asina cu, pasobra un mucha ta bisti bon - tur siman e ta bai disco - tur ora e tin placa pa treat, un hoben asina por ta un lider capaz i sincero pa traha na bienestar di su comunidad.

### Necesidad o Capricho

Berdad ta cu na tur parti di mundo i aki na Aruba tambe nos conoce e hobennan afortuná i esnan menos afortuná.

Igual ta e caso cu no ta tur mucha tin e mesun tanto posibilidadnan pa desaroyá su mes optimalmente i asina pone su talento(artístico o intelectual) na disposishon di e comunidad arubano.

Esaki no ta debi na factornan biológico o genético di un ser-humano pero mas bien pa motibonan structural i misterioso.

Pa por comprobá esaki nos tin di djies wak rond di nos den nos propio barío i cuminsa puntra nos mes lo siguiente:

- Cuanto biaha un mucha no a merece di bai un skol di m.a.v.o. o h.a.v.o. ??  
Pero e mester a keda contento i satisfecho di por bai L.T.S. o E.T.A.O. .
- Cuanto biaha un mucha cu bon skol no a merece di a hanja un bon trabao ??  
Pero e mester a keda contento di por a hanja un trabao den pacus - hotel - pomp di gasolin -snackbar - un panaderia - fabrica di limonada .
- Cuanto biaha un mucha no merece di bai cu vakantie den exterior ??  
Pero e mester keda cas,pasobra su mayornan no tin e cen o si e ta traha e mester juda mantene e famia na cas.
- Cuanto biaha un mucha no merece,pa motibo di un bon conducta,di bai un cine - un discotec - un comedia - o un fiesta ??  
Pero e mester contemplá su mes,pasobra su mayornan tin suficiente cen pa nan por cumpra solamente cuminda pa tur dia.
- Cuanto biaha e hobennan cu ta caba skol ,no tin e derecho pa hanja un trabao??  
Pero nan mester keda contento cu kiko cu ta,pasobra no tin trabao pa un i tur.

Naturalmente no ta facil,despues di a señala e problemanan cu nos hubentud tin di confrontá diariamente den nos comunidad,pa hanja solushonnan pa e problemanan di nos hubentud.

Sinembargo ta keda e pregunta si e problemanan cu nos hubentud tin di enfrentá den e comunidad arubano ta pa motibonan di necesidad di e famia o ta pa motibo di capricho di otroonan??.

Mayoria di nos ta hasi como si fuera cu e problemanan aki no ta existi den e barionan i si nan ta existi mes,anto ta falta di e propio hubentud i nan mayornan.

Ariba su mes un pensamiento asina no ta nada straño,pa motibo cu te ainda nos tin e idea(convicshon)cu bida ta mas suave ainda ora bo biba i laga bo ser bibá dor di otro-nan.

Den esaki nos tin di puntra nos mes si ta asina nos tur como:maestronan di skol - directiva di centronan di bario - voluntarionan - trahadornan social-cultural - mayor-nan - periodistanan - comerciantenan - i politiconan ;ta preparando nos hubentud como e lidernan di mañan?

Ta esaki nos voluntarionan - organisashonnan social - mayornan - maestronan ta considerá como nos tarea pa educá i guia nos juinan o e hubentud arubano??

Ta esaki nos ta considerá como nos responsabilidad colectivo pa nos hobennan como futuro gobernantenan o empresarionan??

Con cu bai bin,actualmente no por ser bisá cu cada miembro o instancia den e comunidad arubano ta trahando di un forma responsabel pa cu e futuro di nos hubentud arubano i e hubentud di futuro.

Locual si nos por hasi ta di tilda nos hubentud di ta floho - apathico - sin micericordia pero nos mes como adultonan no ta juda duna un man asina cu verdaderamente nan por ta e hombernan di mañan.

### Responsabilidad Colectivo

Mescos cu iglesia católico tin e responsabilidad pa converti grandi i chiquito - rico i pover den bon católiconan, asina tambe cada un di e institutonan den nos comunidad tin e tarea i responsabilidad colectivo pa traha na formashon i desaroyo di cada un ser-humano den e comunidad arubano.

Asina por ser menshoná cu e medionan di comunicashon (radio - televishon - corantnan) tin e tarea primordial pa hisa e nivel di conciencia di e comunidad arubano en general i di e hubentud arubano en particular.

Cu esaki te ainda no ta e caso ta algo cu por ser atribui na e hecho cu hubentud no ta un grupo di mayor atenshon i preocupashon pa nos medionan di comunicashon.

Por ehempel, aparte di e programanan local pa mucha esta Matinette (4 - 6 aña) i Quiz I3 (7 - 12 aña); Tele-Aruba no tin un programa lokal destiná pa nos hubentud (I3 - I7 aña i I8 - 22 aña) caminda topiconan educativo i di actualidad ta ser trata conforme e interes di nos hobennan.

Nos emisoranan radial no conoce un programa informativo i educati o pa nos hubentud. Nos comerciantenan te ainda no a sa di copera cu nos hubentud pa duna nan un rebaho - especial ariba articulonan manera: panja - zapato - boeki - disco - revista etc. etc. . Nos maestronan te ainda no a sa di mira nos hubentud como personanan serio i responsabel pa por hasi cierto tareanan na skol di un manera colectivo pero tog independiente di e maestro. Nos politiconan nunca a sa di apreciá e votonan di hubentud pa asina verdaderamente traha na bienestar di e grupo aki.

Sin embargo e ta keda na e hubentud mes cu conhuntamente cu esnan cu sí ta dispuesto pa scucha i juda nan; pa traha na un mehorashon di e situashon cu nan ta bibando aden sea na cas - skol - o den comunidad.

Ta pesei e hobennan cu ta conciente di nan situashon mester acudi na e centronan di barío pa asina e voluntarionan i e trahadornan comunitario por juda nan cu e deseonan i e derechonan cu nan tin pa cu cierto actividadnan - programanan educativo i provishonnan.

No mester sinta warda te ora cu nan acerca bo pa hasi algo.

Abo mes tuma e curashi di forma un grupo di hobennan i acerca bo centro di barío i pidi nan pa ayudo. No sinta man cruzá i warda te dia cu gobierno hasi algo pa e hubentud . Laga hubentud mes hasi algo pa nan mes i demostra cu e hubentud arubano por hasi algo cu of sin ayudo di nan. No warda te ora nan kier juda cu algo den bo barío. Abo mes duna un man i juda desaroyá bo barío. Traha na progreso di bo barío i di e ser-humano. Hobennan trahadó - ta hobennan responsabel. Bo comunidad mester di bo: lidernan respetá i discipliná.